

黎氏家集

六

蘇氏家集

PDG

黎庶昌仲兄椒園墓志銘

仲兄諱庶蕃字晉甫別號椒園長庶昌八歲道光二十
二年我君見背家貧不能自拔長兄篠庭念門戶繫兩
弟董督之愈於成人期在必達其志事所願欲其為教
之方雖嚴師弗如兄亦服教惟謹敦自勵飭不樂以凡
子居與庶昌並案讀屬文必盡夜分每至月落山寒窗
紙映黃金色竹露滴瀝有聲吟哦未已庭有古橙我君
所手植時或黃團下竇大聲砉然擊屋瓦皆碎爭啟戶
往拾返讀如初恆持用笑樂如是者三年業大進中咸
豐壬子鄉試舉人踰年北上公車至澧州道阻不得達

歸而盡棄其學黔亂起喜言兵事治團練於鄉嘗一從
縣令江君炳琳勦賊甕安之上塘軍潰大為羣賊所困
徒步歐血賴天幸得馬以免然無功事弗克上兄亦灑
然不以屑意久之苗教各匪數犯吾里兵不得休同治
元年再入殺戮彌甚封人若羊豕燬廬舍無貧富貴賤
賢不肖皆一掃括絕盡人人露立兄乃率鄉人結寨禹
門寺固守與賊相持凡五年楚軍入綏陽始解論功保
擢候選知州庶昌之從曾文正公江南也遣使迎吾母
兄亦厭兵事挈家來依改官兩淮鹽大使至揚州候補
光緒二年庶昌奉使西洋七年改使日本迎母居滬上

兄往來其間十年甲申母卒偕喪歸里營葬訖將返揚
州喪未終也庶昌諫不聽卒以十二年春載病出抵揚
州百許日七月初五遽沒於旅寓年五十八子尹禕從
行即以是年歸柩卜葬小青桐林先壠之次娶駱氏吳
氏妾譚氏皆前卒妾丁氏子二尹穰次即尹禕女三殤
孫二初咸豐中兄以儁才績學為學政翁文勤同書所
賞許必以詩鳴及至金陵邗上詩益豪且多友人莫祥
芝為哀刻椒園詩鈔六卷雪鴻詞二卷沒後又得遺詩
若干首他日將並刻之彙入家集銘曰

樂天知命無入不宜此聖賢自得之學豈吾輩所能幾

但苟識其理亦可少安窮約守分不移兄之再出病已
難支行不逮禮弟諍不篤乃遂至於斯而止於斯乎噫

自序

蕃束髮即從外兄鄭子尹先生授詩法及弱冠復以文字受知於常熟翁文勤公方公之視學黔中也銳意以樸學為多士倡而餘事亦旁及詩歌同時如莫君芷升張君半塘鄭甥伯更輩靡不爭自濯磨成一家言而蕃獨過蒙獎藉至以異日能詩序入邵亭詩集中期許踰量豈駑鈍所克勝哉及壬子冬公以秩滿受代去黔中亂亦旋作子尹先生自荔波棄校官歸里時從問故後又相約誅茅避寇禹門山中隻雞斗酒昕夕過從益得相與上下其議論而先生之教則不主辭而主意不尚

陳迹而尚興象以此中材恆難之明年先生歸道山蕃
亦以寇氛日逼委身戎馬間於是三年無所作丁卯秋
攜家從舍弟莼齋遠游出三峽汎吳楚東之齊魯觀河
嶽之勝北游燕京窮津門航海還吳浮沈江淮間者又
踰十年其間登臨弔古飲餞懷人凡情有不能已於言
者輒復寄以楮墨顧隨作隨棄不自收拾今之所錄特
十之五六耳屏居無事不復聊奈因檢行篋都為卷帙
雖連編累牘無病而呻比之猿啼鶴唳正不嫌自適其
適耳若謂高視遠鶩將以抗大雅之席而私敝帚之享
則吾豈敢椒園黎庶蕃光緒辛巳三月

序

丙子孟秋濬頤往湖上祭翁文勤公祠回憶曩在史館
追隨日久獲接言論丰采迨還鄉於山左道中屢讀公
題壁詩服為作者憾當時未能以文字就質焉及再至
春明則公已統師廣陵開府吾皖末由相見今乃列俎
陳籩徒深仰止徘徊廡下悵悵久之不三日黎子晉甫
介叔平以所著椒園詩鈔乞序於余觀其自序晉甫固
文勤門下士方序邵亭詩集時即許晉甫異日當以詩
名晉甫春官報罷需次兩淮以詩見投余惜其以名孝
廉棄學而仕偃蹇一官不得展其抱負輒向友人稱道

之而晉甫遂引為知己至謂愛士之誠與文勤無二嗟
乎余何人斯烏足抗衡先輩晉甫之言過已顧於祭祠
之後得讀晉甫之詩彌信公所賞之不謬而余則尤願
晉甫之不僅以詩名也即以詩論風骨道上體格峻整
亦已不懈而及於古余生平作詩持真字訣竊謂憂時
感事以及友朋贈答諸什發乎性情出諸肺腑自不待
言即流覽山川詠歌花鳥其中亦必有我在乃為真詩
間與叔平言之叔平以為至當又嘗謂漢魏唐宋皆宜
宗法不必專學一家門戶之見士人通病夫豈獨詞章
也哉晉甫以為然乎否乎定遠方濬頤

序

吾黔黎氏世以能詩名家其先雪樓先生著有鈴石齋詩鈔四卷及其嗣君伯庸別駕猶子筱庭孝廉續有侍雪堂詩暨慕耕草堂詩集之刻多出先兄邵亭手所商定迨同光間筱庭哲弟莼齋觀察復以文筆為曾文正公高足弟子而其從子受生孝廉亦銳意以撰述自任黎氏一門祖孫父子叔姪昆季類能文章可謂極一時之盛矣獨詩歌一事至於椒園吾尤樂觀其備椒園為莼齋次兄少負才名兼工倚聲中年嘗譜雪鴻詞草二卷余已敘而梓之今觀其詩氣昌體大初不屑為瑱瑱

細響然讀之數腴斐惻跌宕昭彰洵所謂言之有物者
方以古人雖其源出蘇白而晚乃深契一祖三宗之旨
故其所成又自各具機杼百年論定庶幾劍南初白之
流亞與始余與椒園同游常熟翁文勤公之門公生平
不輕許可獨至椒園獎藉無少吝惜椒園從公五稔盡
傳師門薪火而余奔走俗吏老益荒落至垂白無以自
解然則學問之道豈不戛戛乎其誠難哉椒園是集詩
不過數百首以之角逐中原使遇劉項正未知鹿死誰
手余惜椒園之不顯而重慮其言之泯沒也為取是編
錄之都為六卷促付剞劂嗟乎人事何常陵谷善變椒

園正勿謂余之過計也光緒七年辛巳春三月獨山莫
祥芝撰於上海縣署齋

序

四

椒園詩鈔卷第一

遵義 黎庶蕃 晉甫

擬古四首

孤鸞不飲啄誤逐羣鳥翔一朝念其匹中夜起傍徨山
雞與野鷺各自求稻粱本非同心侶何用學死央
青青陵上松根柢互盤錯黃葛生其旁宛轉來相託猗
彼草木微猶然抱知覺誰謂恩愛衰人心不如葛

山頭望夫石一化永不還朝雲作飛雨暮已蒼梧間誰
言方寸平波瀾倏滄海北斗化黃金人心固難買

春蠶已三眠到死絲不斷渠儂各一心背面起長歎采

蓮隔江煙見儂不見蓮抽刀斷蓮藕何事復纏綿

擬古怨歌四首

君家小秦淮儂住長干市兩心不相知咫尺成千里
昨日攬明鏡鏡臺塵忽生塵生猶自可見愛不分明
清晨得雙鯉剖腹見書辭上有相思字寄君君不知
采蓮莫辜根辜根妨藕斷藕斷縱傷心中有絲長貫

飲田舍二首

屋角啼晴鳩桑陰飯朝犢野水綠鍼秧

黔蜀謂稻芽初出為秧鍼蘇詩

好語

是也

遙峰翠簪玉卧聞雲碓響起看煙蓑逐孤村

梅雨昏小市瓜壺綠良農惜地利老住南谿麓隔竹繫

漁舟依山結茅屋雉鳴麥初秀蠶老甚已熟欲償終歲
勞祇此一春足

一春豈云多輟我無限讀新苗已沒脰野漲方到屋貧
家迫生計終歲勤口腹心知無寸田義敢忘樵牧荷鋤
出門去微雨種我菽獨立四無人歸飛暮禽逐賢鄰富
佳醞燥吻先一沃擷菜珍比鮭燒筍甘勝肉但容一飯
飽已信萬事足知命雖未能詹尹無待卜

池上曉起

梧竹瀟瀟響太紛夢回山枕尚流雲要知昨夜雨多少
看取枯荷沒幾分

早行田間

五更山雨過曉色尚淒淒
泉與人爭路雲隨鳥度谿
亂花齊帶笑幽草不黏泥
饁從田父吾生未是迷

立夏前二日觸事有感作餞春詩

春風餞桃李如送范大夫
功成引身去委運全其初
黃鸝豈不好關關聲有餘
起行視庭中綠陰已靡蕪
古來賢達士抱此徒區區
印刻不忍捨百歲將焉圖
潮滿氣則竭月盈精已虛
君問漢留侯赤松果有無
物極不可返乃有韓彭誅

過鄭氏山莊